

Umiarsuit usinik assartuutit Aasiaat Uummannallu akornanni kiisalu Aasiaat Upernaviullu akornanni angalasut, inunnik 12-it tikillugit ilaasoqartalernissaannik Inatsisartut 2012-mi upernaakkut ataatsimiinnginnerini Naalakkersuisut Royal Arctic Line-mik isumaqatigiissusiornissaanik sulissuteqaqqullugit inatsisartut aalajangiiffigisassaattut siunnersuut.

(Inatsisartuni ilaasortaq Knud Kristiansen aamma Siverth K. Heilmann, Atassut)

Akissuteqaat

(Ineqarnermut, Attaveqarnermut Angallannernullu Naalakkersuisoq)

Siullermeerneqarnera

Aallarniutigalugu Atassummit Inatsisartuni ilaasortat siunnersuuteqarnerat pillugu qutsavigiumavakka.

Kalaallit Nunaat nunarujussuuvoq, siammarsimasunik innuttaqartoq. Tamatuma nassatarisaanik inunnik taamatullu nassiussanik assartuussineq akisoorujussuuvoq. Kalaallit Nunaanni sumiiffinni tamani imminut akilersinnaasumik inunnik angallassisoqarsinnaanngimmat, Namminersorlutik Oqartussat tungaanniit kiffartuunneqarnissamik isumaqatigiissutit aqqutigalugit assartuussinermut tapiissuteqartarnissaq toqqarneqarsimavoq. Suliassaqarfimmi pineqartumi Air Greenland inunnik assartuussinermi kiffartuunneqarnissamik isumaqatigiissuteqarfigineqarpoq.

Inatsisartuni ilaasortat aalajangiiffigisassatut siunnersuutiminni allassimasaattut Royal Arctic Line 2013-imi aamma 2014-imi nutaanik umiarsuaateqaleruni ikinnerusunik ilaasoqarsinnaalersussaavoq. Tassalu umiarsuit nutaat atorneqaliinnartut Royal Arctic Line angallavinni pineqartuni umiarsuit nutaat angallavinnut taakkununnga atorneqalertarnerat malillugu ilaasoqarsinnaalissaaq.

Aamma siunnersuuteqartut tikkuarpaat, Royal Arctic Line ilaasoqarsinnaaleruni tamanna nassiussat tungavigalugit ingerlanneqartussaasoq. Oqaatigineqartup taassuma pingaaruteqarnera erseqqissarusuppara. Illoqarfiit taaneqartut akornanni inunnik angallassinissamut allanik periarfissaqarpoq, aammalu Royal Arctic Line taakkununnga ilassusiiginnartussaavoq. Kisiannili Royal Arctic Line-p illoqarfinnut taaneqartunut nassiussanik imaatigut angallassinera saniatigut allanik qinigassaqanngilaq, taamaattumillu imaatigut angallassineq nassiussat apeqquataatillugit ingerlanneqartariaqarpoq. Royal Arctic Line-p ilisimatitsissutigaa, imaatigut angallassineq bussit unittarnerattut ingerlanneqassasoq, tassalu ilarusussinnaasut umiarsualivimmukarsinnaassapput, tasanilu bilitsimik pisisassallutik. Royal Arctic Line-p pilersarusiornermini ilaasut eqqarsaatigisassanngilai, taamaallaalli nassiussat qanoq iliorluni naleqqunnerpaamik assartorneqarsinnaanissaat kisiat eqqarsaatigisassallugu.

Royal Arctic Line-p umiarsuassaasa nutaat sananeqarneranni umiarsuit assartuutit ilaasoqarsinnaanissaannut periarfissanik ammaassisoqassaaq. Royal Arctic Line-miit taamatut sullissisinaanissaq piareersimaffigineqarpoq, kisiannili nassiussat salliutinneqassapput,

aammalu inatsisini sinaakkutaasut iluanni akuerineqartut atorneqassallutik. Tassalu ilaatigut umiarsuarmi siniffissanik inissaqanngippat ulluinnarlugu imaatigut angallassisinnaaneq sinnerneqartassanngilaq. Taamaattumik assersuutigalugu Aasianniit Upernavimmut imaatigut angallassisoqarsinnaassanngilaq.

Suliassaqarfiup taaneqartup iluani inunnik assartuussinermi kiffartuunneqarnissamik Royal Arctic Line-mut isumaqatigiissusiortoqarnissaa Naalakkersuisunit maannakkorpiaq pisariaqartinneqanngilaq, usinik assartuussinermi akuerineqarsinnaasut iluanni imaatigut usinik angallassineq pingaarnertut salliutillugu kiffartuussinerup taassuma ingerlanneqarnissaa Royal Arctic Line-p naatsorsuutigereermagu.

Royal Arctic Line-p umiarsuaatissai nutaat atorneqalerpata siunnersuutip annertunersaa naammassineqareersussaammat, siunnersuut taparserneqassanngitsoq Naalakkersuisut isumaqarput.